

虛受堂文集

虛受堂文集卷十一

長沙 王先謙 益吾

昆明布衣朵如璋妻劉氏墓誌銘

朵氏之先出西夏甯州元初有旺扎勒結者世掌其國  
史守西涼以城降太祖爲中興路管民官當時號曰滿  
朝清者也子朵兒赤字道明年十五通古注論語孟子  
尙書奏對香閣請世祖親君子遠小人授中興路新民  
總管升潼川府尹歷有聲績臺臣奏爲雲南廉訪副使  
諸蠻叛僚佐悉去朵兒赤獨居守遷山南廉訪副使復  
調雲南廉訪使卒於官有子仁通爲雲南省理問天歷

二年雲南諸王與萬戶布呼等叛仁通率官軍討之沒於陣朵兒赤者蒙古語爲多爾濟中國人以音近之字誤譯爲朵 國朝校訂元史 特命更正然而朵氏之流傳遠矣同治庚午余典試滇中得士曰朵如正詢其氏族祖籍甯夏元時爲雲南大官先世有以忠烈與祠祀者名字事實莫可考訂蓋滇婁變亂譜牒失傳久矣余求朵氏之先與如正所言符合宜莫如廉訪使道明父子爲近及考通志祀典忠烈諸門獨無仁通然則節義懷烈迄弗大彰書冊不載遂用泯滅者蓋又不知凡幾也如正兄如璋績學不壽有妻劉氏奉孀母以孝撫

如正兄弟以勤趣晨而作釜迺得鬻眠夕而絢縈迺得膏提學使者楊公式穀旌其閭以同治元年某月日卒享年若干葬省城東十里某原如正光緒二年成進士以知縣分發浙江卽用旣後兄以子鍾麟又復爲嫂請旌於朝而乞余銘其墓乃爲銘曰  
高山崔嵬去天尺二雛匍匐老嫗泣有健者婦負且掖眾脫險屨度夷易衝風無端拔高柏泉臺閬寂怨精魄彩雲之南永安宅報以不朽視刻石

姚訪梅妻張夫人墓誌銘

光緒九年十一月十二日姚公訪梅之配張夫人卒於天津邸舍公悼甚於是爲文紀其淑行以告先謙曰吾妻六歲通書史出語驚其塾師以謂慧勝男子逮歸余虔事尊章先意而趨善事而後告吾父母未嘗不色喜咸豐庚申淞有粵寇吾妻奉母挈家浮海轉徙數千里綢繆持扶離困者數三年然後歸遺產蕩盡修廢舉墜一以己任心力周完資用饒益余司鹺運天津治團練備寇壹意馳驅而不以家爲恤者內事有相也初道光己酉歲大祲吾父散萬金鄉里吾妻覩而慕之常思所

以繼先志遇歲凶必就余謀振救衣服饘鬻醫藥棺槨  
逆儲而時給從官於津地汙濱海運河隄時決壞田廬  
民老幼扶攜奔號或踣斃道路尤憫傷之悉力以濟同  
治癸酉大水齧城西門碣阜崩圻浮棺蔽流下吾妻聞  
亟命舟四出至距城七十里之鐵嶺獲棺千有字者編  
冊仞領餘購地葬焉捐之吾鄉及各行省先後都萬數  
千金時見事迫或不及諮余而行亦知余非遘於財者  
也然奉己縮嗇無好美衣食絲粟自持理不假手臧獲  
今歲直隸淫潦吾妻豫紉棉衣五百襲以賑災黎身自  
經畫中熱遂病不起疾革猶諭家人速成之其好善之

誠終身不改竟以瘁殞悲夫余與吾妻相從顛危不得  
偕老而先余沒其賢且勞旣繫人思而余自是無相助  
以有爲者吾子辱於姻好請紀墓祠以抒余哀嗚呼其  
賢也如是可無銘夫人姓張氏秀水人江蘇布政使理  
問以銘女年二十歸布政使銜候選道姚文枬用夫  
恩封一品夫人光緒戊寅助直隸山西河南賑大吏入  
告 賜樂善好施額生道光四年六月二十八日年六  
十子二寶勳山西候補道恩衍內閣中書以畿輔薦饑  
留養貧民積勞沒京邸會稽李慈銘銘其墓所稱姚孝  
子者也女一適某孫四賡韶壽同乙青詒孫夫人以某

年月日歸葬某原銘曰

卓哉夫人能亨其屯能富其貧勇足以踐義而儉足以  
成仁流萌跣露不殍而實枯醢纍纍不波而墳財則可  
盡心無窮垠士夫所難矧閨門其魄歸淵神在津有欲  
徵信考斯文



張戊生妻趙恭人墓誌銘

先謙妻世父戊生先生手其自爲繼室趙恭人事略泣而言曰恭人之歸也事大父父母稱孝謹吾前室子女三皆幼恭人撫之有恩前室子沒又撫二孫以成立孫又生子而孫婦沒恭人撫孫之子益加瘁焉其教子嚴不以孩提貸雖冠有室出入定省小節必飭性勤敏而強記凡所匡佐巨細咸理吾以卑官需次粵西東恭人偕減僕從躬操作薪斧血痕盈指然審事所宜而劑其豐儉遇義舉贊之必力遭寇亂挈家走鋒鏑中婁危獲安吾得育子抱孫曾以底今日恭人功也吾疾甚恭人

路血方劇奔迫牀下露禱請代三月乃已吾歸後或勸  
復出仕恭人則以守先疇偕隱娛老爲請吾感其意而  
止而恭人竟不幸前逝吾之哀可知也子其爲之墓詞  
以慰吾意先謙不敢辭謹序曰恭人係出浙江山陰曾  
祖彙徵宋太宗二十八世孫遊長沙遂家焉父兆奎母  
氏彭事姑以孝聞恭人年二十歸善化鹽課提舉隨帶  
加三級張恩溥子四廣林候選從九品廣本國子監典  
簿廣枝廣西巡檢升用知縣廣廉候選縣丞女六次三  
適羅振疇楊世珍其四殤孫男六育壽早沒育燕殤育  
和太學生育勳殤育炎育鴻女孫三曾孫一祖基曾孫

女三恭人光緒六年五月十一日卒年五十七某年月  
日葬某原銘曰

賢夫良妻古重偕老勤思其約維家之保溫溫德人實  
相儉苦晨惟食啖夜則在杼罔其羣雛以翼以哺遂康  
其室爰笑爰語孫虞海表劉郭衡陽云何不弔有願弗  
償奇福在後庶俾熾昌伐石鐫辭以表芬芳

劉母張太夫人墓志銘

太夫人武甯張氏處士揮轡之女同縣劉氏

誥封通奉大夫大觀之妻按察使銜湖南候補道鎮字  
定夫之母也劉氏之先無顯仕而定夫曾祖諱良承者  
特旌孝友逮祖若父竝以植德行善名一鄉故爲武甯  
望族自其始遷祖母艾於元末爲陳友諒所獲義不辱  
賊剗乳而死定夫祖母張侍姑痿疾五年扶持抑搔澣  
滌汙垢抵姑沒無倦容前後相望著於邑乘太夫人繼  
之尤以孝謹聞里鄙稱劉氏世有賢婦爲翁姑及夫者  
皆舉以訓其家人婦女之賢者聞而競以相勸其不率

者競以相愧。至今彌久而傳述之弗衰。太夫人條理家事，能使封大夫在約而忘其貧，定夫以甲科服官中外二十年，亦居高而忘其貴。歷守鹽法、長寶、道衡、永郴桂、兵備、道勤、惠篤、誠政、績章，顯有頌美之者。定夫必曰：吾弗盡此心，無以對吾母地下。其鄉人頌美定夫者，必曰：微太夫人相封大夫以教，不及此也。太夫人卒於光緒八年壬午九月五日，距其生嘉慶十六年辛未六月十四日年七十二。葬縣東山塘背首申趾寅子男子二鎮。同治辛未進士由戶部郎中改官道員，鈞選用巡檢子女子四適：張公鸞、李鶴翔、柯際逢、張兆升、孫五、熙、屋、熙。

臺熙階熙基熙塾壬午六月先謙奉先太夫人之喪歸  
自京師始識定夫於長沙未幾而定夫以憂去越七年  
先謙由江蘇學政乞假旋里定夫復在會城每見則曰  
吾與子同抱無母之戚之官而不逮養吾母其慟又與  
子同今埋幽之文猶未具子其思所以紓吾哀者先謙  
不敢辭迺爲銘曰

母心憂勞以發子名仕宦旣成而隕母生曷慰其靈惟  
往訓是程郎君觥觥福我黎蒸億載千齡賢母之榮

左母張夫人墓誌銘

湘陰相國恪靖侯 贈太傅文襄左公側室夫人張氏  
年十八以侯夫人女隸侍文襄公事公五十五年有三  
子一女八孫一曾孫用子 恩封恭人再封夫人壽七  
十五歲以卒侯夫人湘潭周氏夫人其同邑其來侍也  
公方舉於鄉夫人佐治內政竦謹自將公與侯夫人實  
嘉賴之逮公督師定浙東西由浙江巡撫拜總督浙閩  
之 命夫人從侯夫人省於福州公移督陝甘則偕南  
歸時同治六年也越四年侯夫人卒家事一總於夫人  
光緒五年新疆大定夫人省公於酒泉公奉 詔還

朝出督兩江夫人皆從年且七十矣公實敬有加然以感念侯夫人故特虛正適之位夫人亦柔從聽侍執妾媵之禮以終身不以得志姊姊幾微見於詞色君子以爲文襄之治家有法及夫人之循分達理皆近世富貴家所罕見茲可謂賢明也已夫人生於嘉慶十九年甲戌八月初三日卒於光緒十四年戊子十一月初十日後文襄公卒四年葬善化八都井坡中凸上山首丁趾癸子孝寬府學附生 特用郎中 賞花翎孝勛附貢生 特用主事孝同廩貢生 特賞舉人女適浙江候補道黎福昌孫念恕念貽念忠念惠念颺念康念恆念



恭曾孫景發將葬孝寬等具狀請銘銘曰

嘒。星。宵。征。樛。木。之。應。適。溥。其。恩。庶。安。厥。命。閨。門。有。倫。家。  
國。斯。正。王。公。秉。義。以。式。兆。姓。曠。古。繼。美。維。我。相。侯。不。改。  
其。齊。哀。思。好。述。夫。人。善。下。樊。衛。之。儔。雖。卑。弗。踰。尊。光。孰。  
侔。畏。佳。之。山。其。下。維。谷。赫。赫。相。侯。媵。此。邦。淑。德。流。慶。積。  
孫子蒙福我銘此詩揚其芬郁

李母陸費夫人墓志銘

夫人陸費氏浙江桐鄉人其先費氏撫於舅氏陸爲子  
閱五傳有諱賜者始兼姓陸費陸祁孫先生志其家世  
所稱進士山東平原知縣者也賜生淮縣學生淮生椿  
候選訓導椿生熙用雍正六年舉賢良山東武定知州  
熙用生墀乾隆丙戌進士翰林院庶吉士官至禮部左  
侍郎始大其宗是爲夫人曾祖墀生元璜直隸天津縣  
知縣元璜生琮嘉慶戊辰 恩科副貢生官至湖南巡  
撫夫人其四女也年二十適李氏爲嘉慶辛未進士翰  
林院編修貴州布政使諱象鵬之冢婦縣學生江蘇候

補道名家驛之妻兩家仍世貴仕夫人獨習於勤儉絲  
粟自料理天性純篤侍姑疾湯藥嘗而後進扶持抑搔  
昕夕無惰容姑欣然以謂忘其病苦也從夫江南賙無  
告振鄰災有善舉必稱姑之遺訓而已弗尸其美生子  
女各一子殤後強夫置妾遂有多男光緒十年甲申夏  
五月二十九日卒於江甯家人僕婢罔不極哀其生以  
道光十五年乙未閏六月十五日年五十子世華夫人  
出世菽世蔡世遠世蓮世邁世遠側室伍出世蓬  
世蓮世邁世莚側室周出存者蓮蓮邁蓮邁莚女適善  
化縣學生張楫其一伍出待字以某年月日葬某原銘

曰

奉則嗇也而豐於施維孝有思以繼前規陰義不專稱  
陽施皇有明訓執者希惠心嫫嫫祈螽斯天道顯顯章  
母儀備諸懿行爲女師後有取則徵予詞

鮑母袁太恭人墓志銘

光緒十七年辛卯四月八日善化鮑君文浚蓉泉之母  
袁太恭人卒於長沙會城將葬詣先謙泣而言曰吾母  
年十九歸吾父不逮事舅姑若婦怡如也吾父素剛直  
母則劑以和柔門以內肅如也室事洪瑣總於一身叩  
拾俛取晨作而宵不輟天性好潔環堵無纖塵至老弗  
易其故遭亂家匱粥簪質珥衣食自縮嗇而賙給戚儔  
無少遜人有善必亟稱之曰吾導其機使弗塞庶幾彼  
聞益自厲也亦時用世俗因果之說勸人嫺族桀黠者  
多化焉嗚呼其肅於禮而裕於仁也如是子可無銘先

謙則謹序曰太恭人籍長沙太學生洪鏘之女 誥授

朝議大夫鮑相珩之妻生於嘉慶甲戌八月二十三日  
年七十八其卒年七月二十六日葬縣南沙湖橋陳家  
衝上元公山首巽趾乾子五文浚光緒己丑 恩科舉

人四品銜候選知縣新甯縣學教諭文濤湖北候補巡  
檢丕燮皆先卒政縣學生候選鹽知事恩潢太學生布  
政司理問銜出後從世父女二適謝適鄒孫六承螽承  
麟承慶承霖承彥承毅曾孫一功彝先謙母出自鮑於  
蓉泉爲從姑母之歸吾父也家貧甚外祖父母先亡與  
外家絕者數十年而蓉泉與先謙同就縣府試同爲諸

生用文字相交好。彌久弗替。歲壬午先謙銜艱返里。蓉  
泉來哭吾母。越七年先謙再以病歸。與蓉泉相見又哭。  
太恭人焉。以歲月之不居。人事之多變。而吾兩人者亦  
俱鬢髮衰白。可感也。方蓉泉少時。文尤高。名尤盛。同輩  
望若天人。而婁困秋試。迺從戎幕。得官年五十。尙羈末  
秩。時命之不可知如此。然其得鄉舉。適先太恭人卒一  
年。抑豈非誠孝所感。而天以慰太恭人教子之志。與其  
將佑啟蓉泉而益顯大之也。又必然也。銘曰。

教誨而祝其式穀。哀哀者爾所生。邪苑與枯兮。倚伏蒼  
蒼者孰虧盈邪。而及身見子之成名。人皆曰是以報賢。

母之廉貞。嗚呼千秋萬歲。兮護此佳城。



龔母沈太恭人墓志銘

自同治壬申先謙奉母太夫人入都時同鄉京僚善化龔省吾舍人長沙陳伯屏編修皆迎母京邸吾三人以姻戚故登堂拜母承望歡顏家人往來互詢高堂起居色笑以爲樂三家皆貧而薪米之供尙不匱官俱不高遇春秋闈必各得一衡校差以幸與斯文爲老人光華雖鄉人多有老親而見吾三人者獨得晨夕侍養感歎稱羨咸自以爲不及也光緒壬午先謙丁母憂再入都則伯屏奉母之任大同惟省吾數相見逮先謙歸自吳罕與通訊聞其母健官遷則喜倭寇震畿輔省吾母以

老病畱都則頗以爲憂歲乙未聞以乞郡至皖余謂以  
省吾才望當不日除大郡博堂上歡又爲大喜未朞年  
而凶問至悲夫旣哭弔於湘江舟中遂以銘墓之文來  
屬先謙不敢辭謹序曰太恭人沈氏系出浙江會稽先  
世某籍湖南父聞衣諸生游廣西殉粵寇難 賞雲騎  
尉世職祀昭忠祠母氏李年二十歸 誥授中憲大夫  
龔某志識堅強過男子凡女紅酒食之事靡不精醫藥  
卜數之書靡不習督訓諸子嚴克其愛逮於夫歿畢營  
婚娶推食分潤用調親族自奉無絲粟妄費燕朔苦寒  
省吾製狐白衣以進卒卻弗御其不以尊榮易心如是

子五省吾名鎮湘由進士官至禮部郎中截取安徽補用知府運屯殤煥湘候選通判先六月卒鏡清江西樂安典史炳湘候選府經歷女一適同邑張惟純孫五兆崙山東候補縣丞升用知縣而安湖北候補典史家愧卒慶龍福建候補巡檢顯家曾孫二聲述聲九曾孫女二用子 恩累封恭人以光緒二十二年正月二日卒於安慶省城距其生嘉慶二十年八月十日年八十二卽以其年六月日葬長沙河西都禾黃觜首甲趾庚兼卯酉銘曰

婦代有終大易所重篤生材賢蔚爲邦棟五馬翩翩來

虛受堂文集

卷十一

夫

導母輿云何徂謝未安厥居昔年京國歡對魚筍今茲鄉山椎牛涕隕榮養未逮而丁鞠凶鮮民之生銜恤實同茹慟宣詞式章鴻懿潛神大幽增榮奕世

伯母郭宜人墓誌銘

伯母姓郭氏同邑人也郭氏以儒世家科目蔚起伯母年二十來歸吾伯父虎臣府君三十而喪夫守節四十年而沒於光緒乙亥二月十九日年七十有一其年用姪先謙官 覃恩貤封宜人厝京師南郭湖廣義園越歲壬申十二月某日歸葬湖南省城南十八里杉木衝山伯父始與吾父析居其沒也而吾父迎伯母以歸中年多疾不怠於行吾母則上下扶持之時其食而進藥餌甘旨焉數年疾良已吾父以兄先和爲之子又爲之娶婦旣成禮矣而兄卒婦矢節以待吾兄弟之爲立

後也於是伯母又耿耿焉幾得孫二十二年而卒不獲  
可悲也夫蓋吾家自先大父有弟蚤死無後唯獨先大  
父有吾父昆弟三人皆不壽而伯父最先沒又唯獨吾  
父有吾兄弟四人其三無嗣以死獨余僦然存耳三娶  
婦厯十有八年而得一男裁數月伯母竟不能待立後  
以逝吾又以悲王氏之澤之微不僅爲伯母慟也伯母  
旣卒其婦號哭嘔血無幾亦死伯母性狷潔平日居室  
中若無與家人事者家人習而安焉及其沒而哭之皆  
哀夫死而能以義自將有婦而能使不有其身以相從  
也韓愈氏所稱肅禮而裕仁者與銘曰

太歲在末奉與於都問還何期懼衰不虞不虞曷來朱  
顏鶴骨罰降我躬纏殃遂蹶昔往而笑今歸以咷門祚  
實艱我心憂忉高山如屏連隴如帶惟藏永甯流澤後  
裔

嫂吳宜人墓誌銘

長嫂旣沒之秋其弟抵書予曰女兄之相君兄二十一月厲節待後者二十有五年不幸死矣平生志行宜有述無使吾兩家子孫久而忽忘也予復之曰微子言固然予不敢忘且嫂之爲實有足稱於後者先兄會廷公爲伯父後嫂之歸也伯母存事之恭謹有禮以予父母恩遇之益感奮不自惜性坦直意所不可盡言乃已家人嚴憚之咸同之交予衣食於奔走娶或四三年而天卽又皆荏弱不事事米鹽錢幣出入之數歲時親朋往來饋問之所需烹飪縫紉之所給嫂銳任經理爲先後



倡不以難諉不以勞見德予歸母爲予言之從而謝焉

嫂曰予爲母婦家事予事也甯以夫存亡異邪國家

禮教漸被之日久先王之道天地之經於今而大明矣

通都大邑士君子之所講論達於窮陬僻壤傭奴販婦

之家挺節義甘荼堊者踵相企也不足爲嫂異獨其心

地明白無畛域之隔赴義如爭利急公過其私使母不

室悴予不道憂士大夫家兄弟號稱讀書而不究於理

者相友助若此猶或難之況於婦人而不獲食予一日

之報以沒可不爲大慟乎兄卒嫂無出女吾姊女蘭儀

年十五暴病死嫂悲慟成疾榮兒生嫂內乳母於室己

撫兒臥憐愛曲至而疾益劇伯母卒哭之嘔血遂以不起疾甚以母生日近強起挑鐙繡雙履爲壽旣沒母持履哭語人曰余視此鍼綫迹心縷縷作痛也疾方作夜手計簿沈思困甚予詰所以曰鉤稽今日所出少不合苦憶弗得意舍去則竟夜不成寐予曰嫂病矣盍少休再三促之乃已其勤密如此悲夫先兄用 覃恩貤封奉直大夫嫂封宜人以光緒元年乙亥五月二十一日卒於京師年四十四越歲壬申以其柩歸與先兄同祔葬會城南十八里向家衝山祖塋右側嫂吳氏籍湘陰女弟適善化縣學生劉冕以節撫孤吳氏之先世晦其

光而有二女。如是。可以想其家法。弟光堯。學行敦篤。爲  
名諸生。銘曰。  
育女爲娛乎。促其齡。待嗣報夫乎。日弗暝。天乎。天乎。而  
不斯人之矜。

姪女蘭儀壙銘

蘭儀余姊女也。姊旣前有子男女二家貧又多疾不自育。而以女余。邱嫂嫂亦樂得爲之娛。甫八月以來。食必哺。寢必偕。顧復恩勤以底於茲。女娟好閒靜。不苟言笑。如成人。舉家愛憐。嫂重之甚。將爲擇佳壻。蓋自余兄之沒。嫂寡居逾二十年。待余兄弟爲立。後久未得與女共晨夕。十二年矣。而卒病以死。悲夫。女病亟。以次與家人訣。痛哭俄而笑不止。余撫之曰。兒何笑。兒知女笑乎。曰。固知之。強不能制。奈何已。又以手摩腹。噤齟而言曰。苦。苦。聲未絕而卒。至今嫂與余述沒時情狀。猶相向泣不

成語也某年月日葬京師南郭湖南義園銘曰

女之北也甚歡而不以生反悲以酸乎懼而母將從於

黃泉

姪女媚祖墳銘

同治七年戊辰禮吾寓書京師曰季春之朔呱呱在乳  
浴以蘭湯命之媚祖維堂有萱朝弄夕撫蓋娶婦望孫  
者垂二十五年而余舉是女謂不可使乃兄晚聞也余  
得書欣喜恨不卽日走數千里歸而一抱爲樂己已旋  
里入門拜母畢急問女何在禮吾曳余兄且坐徐曰媚  
祖死矣余驚而起卻立無語良久潛然以悲回視家人  
無不戚者女殤以生年九月二十日瘞某原女生而余  
不見其貌沒余不知其疾而哀如是甯獨爲女哀也嗚  
呼禮吾請余文以塞其悲銘曰

虛受堂文集

卷十一

三

是長沙王禮吾之殤女藏形茲土其以終古

姪女鶴胎墳銘

姪女生同治庚午之元夕其歲有鄉試余母吉其生以爲亡弟登科兆乳名之三元女生而臞其父母又皆臞甚字曰鶴胎肇祖其譜名也爾雅之義肇祖元胎始也女行居三胡以名大女自龔出二女又早殤而生女以爲余兄弟似續之蕃將自此始也故女也而雄名之亦母意云爾女生數月幾死逾朞弟夫婦俱亡女病瀕死者數嗣是攜以北無日不憂女病女身日益長瘦骨裁如拳四歲不能行坐性甚慧余取古謠諺及詩語通俗情者教之歌口齒清脆聲琅然滿床席自弟亡後余塊



然獨立痛弟不能再世而女爲一綫之延也女雖病亟  
日必呼余抱歌而索余和余顧之淚隨聲下也自其始  
病兩股旁溼痰流注潰六七孔膿血不止腐肉層出以  
至死死之前日猶自挾其數齒天乎女之無罪也女死  
甲戌二月二十一日前一月天余女九月前大女殤焉  
嗚呼越翌日厝於蘭儀之右銘曰  
女生何罪死何依魂兮歸來無使我悲

女慰慈壙銘

女慰慈椿有二月而字自菴先生之第三孫又八月而  
殤女生數月能言秀外而中慧問以家人居室厯指不  
爽聞予聲輒歡躍叫呼予亦逾時不見不樂也每日斜  
抱至門外對門牆上青草叢生蔥鬱可愛女注視笑語  
良久乃入病劇數月稍閒至門猶視青草作笑態而口  
已不能言可傷也已周氏壻少女六月予頻過其家紅  
裾繡祿奉手拜跪旁人皆笑予顧之而悲予妻之孕女  
也時盡室行大江中或曰是生也無根易折信耶何以  
解於舟之人殤以同治甲戌正月十三日旣厝矣爲之

銘

女·生·置·酒·兮·予·母·歡·醉·名·女·娛·祖·兮·慰·慈·其·字·劃·而·逝·  
兮·來·何·爲·予·涼·德·兮·召·之·嗚·呼·

長男榮祖壙銘

京師南郭湖廣義園家壘壘以千百計其初無王氏墓也同治壬申余挈家來京先後四年余伯母余邱嫂二姪女一女一妾一甥一僕婦一乳母之子皆沒而厝此今余兒又往矣悲夫兒名榮祖其沒以光緒二年五月十二日距其生元年正月八日蓋暮又百二十餘日矣嗚呼余家男子今唯余在耳余母年七十余年三十有五兒之生距余弟禮吾生之歲二十七年前此未添一丁也兒生一月而病迄弗大瘳病且劇又數月疑可以不死矣而竟死將以幼慧促其年耶嗚呼惟其慧余所

以尤悲之深也銘曰

兒命匪短藥所誤薄德不任負宗祖魂氣安之骨歸土  
此石可泐恨終古烏虜吾兒尙何言哉

虛受堂文集卷十二

長沙 王先謙 益吾

劉秉齋墓表

故湖南善化縣學生劉君秉齋以同治三年正月十三日病卒享年三十有五其年十二月二十六日葬會城東林子衝牛角塘越二十三年爲光緒十二年丙戌而其子鉅鐸乞余表其墓咸豐之末余年方少伏處閭里稟先君子命不敢妄交游獨君與湘陰吳光堯莫階善化張希詠閻軒以姻婭得時相往還講論文藝君年最長跬步以禮自繩檢鞠躬偃容莊而色和氣專而善

下與人言若唯恐傷之先。君子尤愛敬君。每諭先謙秉齋君子也。汝爲人當取爲法。君苦耆學於經史百氏詞賦諸家言。旁及醫術象數靡不研究。博通喜聚書家無餘貲。則典衣以購。每得善本。以夸示余輩。於是莫階閭軒依式求之。必得。迺已相與摩挲賞翫。以爲大快。而君頗怪余不蓄書。余笑曰。俟真能讀書時。迺求之耳。實則余貧困尤甚。欲如君典衣購書。亦不能也。君篤於友朋之誼。尤尊禮正人。樂道人爲善。蓋天性然也。始與余仲兄敬吾交密。而伯兄會廷娶吳氏。與君爲僚壻。而早卒。君聞其賢。每言及。輒想望歎惜。仲兄沒。君以詩哭之。慟。

自是弟畜余敦勉周至余時豪邁自喜好劇飲大醉君  
一日峻詞督勸余爲之立起自責君迺長揖謝過去它  
日過余有以它省鄉闈文一冊來者君取視之余曰是  
咸謂不佳君不知邪君曰吾但師其佳者其不佳者置  
勿論可也余愧且服自是不敢爲附和訾詆之言君諱  
冕字星翥秉齋其自號其上世爲衛輝人初徙武昌至  
君之曾祖某再遷長沙占籍善化君所箸有史記校議  
蒙求增輯各若干卷其妻冀階仲姊也當君卒時鉅方  
七歲鐸六歲以節撫教二孤俾有成立今鉅爲縣學生  
鐸光緒乙酉科舉人自君之卒余每謂人吾黨中自是



無畏友矣。眾皆太息謂然。今且廿年。鄉黨聚語於它人。或不能無毀譽參錯。獨至君。無異詞。必曰。劉君端正樸厚人也。而余自奔走四方。交與幾徧海內。求如君之惻惻。懇至。表裏純潔。尙未見有能及者。故至今君之言笑動止。常在余心目間。微鉅鐸之請。余固思託文字以傳君於無窮。故遂論著君之生平。伐石紀辭。使後之覽者。有以考見君之爲人。而知爲善者必昌。其後而君之子孫亦愈知所勸厲。以無愧其先人焉。十二月二十九日。長沙王先謙述。

張夫人墓表

代

曾國荃曰自世衰道喪古稱富好行其德者雖士夫以爲奇節況婦人乎然余巡撫三晉當光緒戊寅歲大饑燕豫同時告災天子爲之輟膳發內帑賑窮黎捐助徧於十八行省義聲感激風動殊域其在閨閨命子孫鬻田產出釵釧典質相赴救者指不勝僂彼豈急功近名迫不得已而然哉余以歎聖清列祖以來用仁義教育天下驅薄俗返之古德意入人至深厚也姚君文枬與余夙相知其子寶勳時方以山西候補道奉檄辦捐有成績其妻張夫人復以助三省賑賞樂善

好施額時人榮之越六年張夫人沒姚君迺紀其淑行  
乞余表之隧上夫人籍浙江秀水江蘇布政使理問以  
銘女年二十歸姚君舅姑安其養諸姒順其施姚君父  
資政公嘗散萬金鄉里矣夫人矢承先志每歲歉皇皇  
焉若疾苦之在己姚君有善舉必力贊或他往必代謀  
其所施予饋醫必潔衣必溫厚疾以醫藥殍以棺心神  
交營次第周舉其爲善於鄉及他省咸可錄以從姚君  
任所久天津民頌述之者尤多先後歷數十年而不渝  
費萬數千金而無德於其色又時以善行訓其子故寶  
勳見義勇爲其次子恩衍官中書京師以畿輔大禮留

養貧民積勞沒而夫人卒無懈志其疾也以直隸夏潦  
豫紉棉衣賑災黎躬經畫中熱及病革猶諭家人速成  
之嗚呼賢己夫人以光緒九年十一月十二日卒於天  
津邸舍生道光四年六月二十八日年六十用夫 恩  
封一品夫人子二女一適某孫男四賡韶壽同乙青詒  
孫孫女六夫人嘗從姚君辟粵寇奉母挈家汎海往來  
數千里綢繆三歲以脫於厄逮歸料產執勤條理秩秩  
家道復興姚君旣慷慨好義才夫人之爲一以委重夫  
人迺時其羸縮持以應務沛若有餘姚君分司天津鹽  
運攝都轉治團練禦寇用大吏薦擢道員候選加布政

使銜搏心勤事聲績蔚起內得助也古言婦德貞靜守  
節有恥有法而已若夫人迺所稱才明絕異也而行之  
以仁恕終始之以誠蓋尤難者使婦人盡能知此義則  
家得其理而天下可以無爭姚氏將世昌矣其所由來  
不可泯焉無章於後於其歸葬書以遺姚君俾揭於某  
山之原某年月日表

誥封中議大夫五品銜國子監助教曾君墓表

君諱觀文字通成伯偉其自號晚更號頤庵姓曾氏其上世爲福建人至宋右丞相懷遷常熟遂世爲縣人常熟自明以來多貴仕 國朝大學士翁文端公心存暨其子今太子少保工部尙書同龢 弘德 毓慶先後授 讀海內稱邑望者必首推焉君天姿穎異十三通諸經受業文端之門學益淹貫中道光甲辰 恩科舉人會試僥得者婁而太夫人春秋高君眷戀庭闈澹於進取曰窮達有命吾生平所志在兼濟民物旣不用於天下矣將以施之一鄉故於拯潦災興水利振文教邑

善舉艱且鉅者必君董成之咸豐間邑歲歉鄉民無賴糾黨劫掠謝德者尤凶橫眾數百君曰不急治是釀亂也固請邑令帥團丁往自以扁舟先遇德於塗冒刃進擒之誅數人而事定粵寇犯蘇州龐文恪公鍾璐爲江南團練大臣駐常熟戰守之策一以諮君今大學士李鴻章督師上海檄君與提督劉銘傳援降將駱國忠於福山常州垂克援賊數萬走閒道襲常熟城守空虛糧臺在焉君率局丁四百人登陴助守厯七日援師至而圍解自粵寇猖狂東南摧陷國家兵饜皆絀勢岌岌矣而閭里儒生奮其忠義之氣各號召鄉人子弟提

戈殺賊其轉戰行省勛節炳然者落落著國史卽竭  
智勇衛桑梓出萬死一生之交急公義如圖其私敗則  
授命成不言勞如君之爲者往往而有卒以廓清氛霧  
重光天日非今之民情獨厚於古也列聖仁厚之澤  
深入人心而先王詩書之教日益昌明其由來非一朝  
夕之故也君始援例爲國子監助教江蘇平晉階五品

賞花翎曾祖夢弼祖溪旌表孝子本生祖濤父敏

謙兩世以君官贈奉政大夫妣宜人君卒於光緒庚

寅二月十七日距其生嘉慶丁丑九月五日享年七十  
有四其年十二月十六日葬虞山北麓曾家山娶同縣



王氏繼娶杜氏先卒俱封太淑人杜與君合葬妾陳氏子金章慶溥傳章廷章王出承章亮章綸章愷章杜出綸章出後叔父女三適潘楊徐孫治華艾華蔚華蔭華妃華霽華鶴華孫女七長次適錢餘未字曾孫崇世曾孫女一君教子孫有法度雖祁寒盛暑躬自課讀以底成就金章由舉人官內閣中書慶溥由附貢生官湖南同知直隸州知州傳章由附貢生官兩浙鹽大使餘子及長次孫皆文學博士而金章廷章先卒先謙與金章爲同年君三子一孫又出先謙門夙聞君之盛德慶溥在湘過從尤密因乞書君志節行事揭之墓上俾後

有攸慶溥外內修飭當官有能譽它日所以褒崇其親  
者方未有已也姑爲之立表以俟焉光緒十七年辛卯  
春三月長沙王先謙述

誥授通奉大夫江蘇補用道李君墓表

皖之南有隱君子姓李氏名宗煥字輝亭先世出唐宣宗第八子昭王訥至宋銀青光祿大夫德鵬居安徽祁門之新田其裔孫定南宋時遷黟之懷遠鄉南屏山下遂爲縣人十七傳而至文耀是爲君曾祖文耀生世墀世墀生高琳義行具安徽通志高琳子二君其長也生有至性幼遭亂與父相失號山谷中往來尋覓卒與父遇學賣懷甯忽思母亟歸則母病甚逮夕而歿人謂誠孝所感旣以居積饒貲設肆十餘用當其才千里外無能欺毛髮家日益豐君顧不自豪也出所有建宗祠

設家塾貧老孤嫠月有賙給以惠其族推而至於姻婭里黨所以軫恤之者罔不周助書院賓興費及它義舉數十以仁其邑人推而至於鄰邑及各行省凡有善事所以匡贊之者罔不力嘗獨修銅陵江隄七千餘丈大吏將入告請 獎君曰財不散愚也微名私也力辭大吏夙重君聽之光緒間山西大饑捐巨金振濟議敘道員分發江蘇 贈三代二品封典而君不樂仕宦未嘗一投手版謁大府常買舟出遊蹤跡徧江南北遇名勝古蹟流連信宿興盡遁去居銅陵大通鎮之荷葉洲四面環江輪舶往來冠蓋鱗萃推誠款接務盡其歡無識

不識皆知君之爲善人也。君雖席履豐腴而自奉儉嗇。鮮衣美食。屏弗御。遇人子弟間遊侈靡。必正色規之。扶翼寒賤。推解衣食。多至通晷。敬禮賢士。聞聲興慕。其於鄉邦文獻。尤攷求弗懈。祀俞理初先生。鄉賢刻其遺稿。羅端良金正希吳殿麟汪南士諸先生撰箸。皆重栞流布。之余視學江蘇。介蕭君敬甫來見。語大驩畱十數日。見余刻皇清經解續編。曰。吾幸遇此不朽盛事。立捐貲助焉。逮余假歸。月通書問。必舉所欲栞播之書相商。權其用心深長。樂善不倦。宜獲天佑。以輔世庇民。不意奪之如是速也。君歿以光緒十七年九月十三日。距其

生道光八年二月二十六日年六十有四妻余氏 誥  
封恭人側室林氏丁氏子英元縣學生分部學習主事  
英亨殤英耆女適某適某幼未字孫顯謨君嘗獲吉地  
於縣南五都舊菴遷葬高祖父母父母以伯叔父母諸  
人耐自營生壙於側題墓石曰爰得我所遂自號曰爰  
得老人其曠達如此將葬英元以書來曰知先子者莫  
先生若願有述也余嘗爲君生壙志銘迺爲文遺英元  
表諸墓道君它事多可稱茲不具最其大者光緒十八  
年冬十月長沙王先謙表

翰林院編修陳君墓表

光緒辛丑秋吳自修編修慶坻走書告余曰陳杏孫死矣而其不忘親之心未死也自其通籍後遭父喪不及親含斂哀毀柴立既授職將北上而其母黃太宜人寓滬久族戚咸在不欲遠離故杏孫歸侍未嘗終歲京居每爲慶坻言吾母子相依爲命不忍以人世浮榮易吾晨昏之樂其至性有過人者己亥冬入都庚子夏病乞假將返而寇亂作犯暑跋涉六月二十四日沒於沂水縣雙堠鎮年甫四十二母年八十一其可哀如是夫子素嘉與杏孫其忍不章以文杏孫名昌紳字穉亭錢塘

人祖春曉歲貢生以詩鳴父翔鶚縣學增生候選訓導  
杏孫七歲能作擘窠書十六應縣府試並魁其曹補縣  
學生光緒二年丙子舉於鄉丙戌成進士改庶吉士庚  
寅散館授編修辛卯爲順天鄉試同考官甲午大考  
列二等記名遇缺題奏妻某氏子輔相以某月日葬  
某原余主浙試得杏孫榜放來謁年未弱冠風神出羣  
余心異之及督學江蘇其中表兄仁和葉槐生維幹爲  
余稱其詩文及其志學之美嗣杏孫訪余揚州談經校  
藝半月別去見其學且大成以爲當踐歷崇顯有所表  
見不意不幸至斯極也余知交多浙人兩爲會試同考



官所推薦尤多。浙知名士義烏朱蓉生、一新會稽李恣、伯慈、銘秀、水趙、桐孫、銘最著。居京師，往來尤親者錢塘諸幼塈、可忻也。而槐生在滬，助余校栞，續經解至數百卷，爲人醇竺而勤敏，博學工詩，貌清癯甚。余竊憂其不壽，未幾遂沒。餘或齒少於余，遠甚而皆爲古人矣。悲夫！悲夫！人生蹤迹難合，并獨文字之契結於性情，彌久而不可磨滅。蓉生悉伯桐孫之文，余旣栞而傳之，幼塈有所造作，謙不肯出，故不能得其一字。昔索槐生遺藁於杏孫，卒不獲，以爲恨。聞杏孫遺箸多散落，今自修經紀其後事，甚至其必使有聞於世矣。余故爲文視自修以

貽其孤使鏡石墓上繫以詩曰

嗟民之生風飄雨暴有性斯凝有文斯曜賦君以性弗  
遂其天博君以文弗昌其傳海波翻飛蹙駕於陸云胡  
斯人而丁斯酷清廟之器委於林垞如日將中還墜東  
溟黃髮倚門迺爲兒慟老淚傾泉漚濤憤涌知子猶眊  
茹哀九原有慰其靈揭此新阡

李徵君墓碣

仲雲先生既沒二十年其子祥霖奉母丁夫人之命捧家傳再拜泣而言曰先公之卒也時方穉齒於先公嘉言懿行弗能究詳惟憶先公家居詞與色藹然以莊下逮僕婢曲殫恩紀與人務盡懽而禮敬無懈溫溫終日不見涯際暇卽紬覽四子書顧不孝曰應務塵雜則心氣浮動賴是以義理養之庶鮮差謬乎已而歎曰吾家積累厚吾不敢望汝輩取高爵厚祿惟勉自樹立作安分秀才世世毋隲詩書之澤於願足矣祥霖今年三十餘愧不克自振拔以崇顯先德敢乞執事文傳之無窮

余曰微子言若先生者余固願有述焉先生諱槩仲雲其字自號庸齋湘陰李氏世居會城曾祖世亮祖疇優貢生桂東縣訓導皆 贈榮祿大夫父星沅翰林院編修官至兩江總督太子太保廣西 欽差大臣卒諡文恭曾祖母彭祖母陳母郭皆一品夫人先生少承家學器度不羣年弱冠侍文恭公於陝西撫署繕章奏助理庶政用是周知當世之務文恭公卒於軍先生扶喪歸文宗眷念舊勞 命服闋送部引見而是時粵寇已踞金陵婁圖上犯巡撫駱文忠公秉章設船礮局於會城請先生及諸紳士董之又疏畱督建憑城礮臺暫緩

引見以助饗勸捐督造船礮先後積功 賞舉人花翎  
候選道員鹽運使銜先生耆善勇爲修儲備倉以禦災  
荒設澇河義渡以拯覆溺建保骼堂買山聽貧民輦取  
合煤黃土而侵掘墳冢之禍消立卹無告育嬰保節諸  
堂而老疾孩幼貧嫠之人得所資以爲養皆領官錢集  
眾貲躬倡經始條理善成義聲徹於行省晉豫大饑紳  
民鳩貲助振走集託致數盈鉅萬涂公宗瀛自粵西移  
撫河南道湘上爲豫民請借倉穀眾難之會有官運米  
振陝饑舟抵襄陽奉大吏檄止先生知之馳書移濟自  
曾文正胡文忠左文襄諸公督師平寇 朝廷滋嚮用

楚材饒械咸取給官局領之士人薦紳筦政要大府倚以取辦地方利病官吏用舍舉虛已商權國朝二百餘年士大夫家居例不與公事至是而其局一變然身其事者據非所宜近利則以私成謗侵權則積疑生危惟先生意量淵然善全終始天下無識不識皆稱曰善人及沒而官民同聲嗟惜蓋信於人者有其道矣先生性澹泊不慕仕進同治初特徵入都光緒初以人才被薦皆辭不赴卒於光緒七年辛巳七月二十六日距其生道光四年甲申二月二十二日年五十八初娶湯繼娶丁皆封夫人妾王施子男子三輔輝輔燦並殤

祥霖元名輔煥縣學廩生湖北試用道子女子八以卒  
之明年十月葬善化八都張家衝山莊丁酉癸趾余以  
妻黨姻連故謁見先生嘗薦入山東軍營辭不往先生  
曰子索居胡自給盍從吾弟行乎蓋是時先生弟桓方  
以江西布政使督辦陝南軍務也卒從至湖北而返然  
余少窮困不爲親戚容接獨被先生兩薦私感至今追  
維盛德和光重以祥霖之請故遂論著先生生平使揭  
諸墓道俾後有考光緒二十八年歲次壬寅春正月

虛受堂文集卷十三

長沙 王先謙 益吾

金匱華氏新義莊記

代

善夫吳人之好義也宋史稱范文正公仲淹雖貴衣食不充置義莊贍族朱子言行錄詳其於姑蘇近郭買田數千畝族中長而賢者一人主出納人日食米升歲縑匹嫁娶喪葬有贍給令聲餘慶洋溢累禁高義之衰炳於宸翰於是其鄉之人若吳縣陶氏崑山顧氏長洲陸氏涵泳聖涯崛焉踵武而金匱華氏合數世之力以成先人未竟之志前盛後美甲於列邑其猶有太伯



延陵季子禮讓之遺俗與不然何好義者之多而良法  
流於無窮也華氏之先在宋居汴明時諱宗韓者再遷  
至鵝湖爲縣人家故有義莊自國初至今不替宗韓  
十四世孫清蓮慮族蕃資乏謀新之未逮其子春亭耕  
樂孚吉墨亭承遺命分作合儲私入公出父兄前攜子  
弟後躍月有要歲有衍孟晉十耆迺疆迺構最田租千  
二百石舍若干區仿文正法董以族賢能者而貳其副  
自歲賦外廩其穀食鰥獨孤寡廢疾糶其餘助婚葬學  
有塾課有獎實與有資饑饉有備旌別以謹始賞罰以  
善成宏綱細目粲然具備別割田百畝厚其本支祖乾

若公以下五世厥後遞殺視莊之主某年月日新義莊成而耕樂子鴻模屬余以言余惟古者卿大夫立宗宗子以世祿收族大功以上無異財至庶人無宗不能相給故同姓雖從宗合族屬而調救之誼使借助州閭所以通宗法之窮也後世貧富之權不操於上於是朝廷無使人均財之道而士大夫及庶人有力者適時出所有以贍族黨之窮皆率循仁義不假勉強視古法制相維繫者恩有加焉而論者以宗法敗壞追慨世祿之不及反古其有異於欲復井田封建之爲者耶今世教昌明人習於善然大半華胄貴顯易於爲力以余所聞吾楚

長沙彭氏建祠瞻族不有其貲巴陵劉氏儲義穀施族人家落不問其所爲與華氏略等而聞者或以爲迂嗚呼其迂也乃其所以爲賢與舊例直省民能分財相養者吏得上聞請獎故立義莊之家皆題奏優敘競於名者亦或勉焉近且有無其實而冒其名者矣耕樂昆季之爲是舉不求旌賞行事立心加人一等其尤足尙也春亭諱存恭實始營度無祿卽世孚吉名存信沒先春亭有子鴻漸能助耕樂墨亭成之耕樂名存寬墨亭名存吉倡辦團練得顯職鴻模以選拔舉於鄉癸酉典試所得士光緒二年二月記

向家衛先墓記

先曾祖考名園公姓王氏諱聲揚長沙縣學生乾隆二十四年己卯四月初十日申時卒道光八年戊子六月十五日子時年七十 誥贈榮祿大夫先曾祖妣左氏生乾隆二十三年戊寅正月二十二日申時卒五十五年庚戌九月初九日申時年三十三 誥贈太夫人先祖妣曾氏生乾隆四十八年癸卯十月二十五日辰時卒道光二十九年己酉五月二十四日亥時年六十七 誥贈太夫人先兄會廷公諱先和生道光九年己丑五月初二日丑時卒咸豐三年癸丑六月二十九日

酉時年二十五 馳贈通奉大夫先嫂吳氏生道光十  
二年壬辰七月二十三日寅時卒光緒元年乙亥五月  
二十一日酉時年四十四 旌表節孝 馳贈夫人先  
謙以憂歸自京師始究心形家言交善化劉君建業叩  
以體勢之奧宜忌之理豁然有會從而諏先墓之宜遷  
者謀之既久得省城南十六里向家衝山遷先曾祖以  
次五棺葬焉上左爲先曾祖考右先曾祖妣下中先祖  
妣左先兄右先嫂也先太夫人以今年十月葬仙人市  
栗樹壠遷先兄敬吾公以次五棺附凡遷者其先葬之  
邱皆弗足以康體魄厯有徵信覩之爲怵惕慘慟仰託

先人餘蔭假劉君之力擇壤而吉庶少安焉嗚呼子孫  
之於祖先厯百世猶一體也其生也疾痛呼號爲子孫  
者安坐勿掄謂之非人及其死也乃異視之或世遠而  
淡忘或以力薄而不任託名戒慎謂茲事茫渺舉啻爲  
無足信遇指迷闢謬者而不一動其心噫何其忍也然  
卽有其心不必遇其人遇其人不必果得其地吾惟盡  
其力之所得爲與心之所能自致而其不可必者徐俟  
之天焉若聰明白矜精微弗究輕遽狂惑任心改作徒  
以叢咎而召殃是又與於不仁不孝之甚者矣後之子  
孫尙敬聽之光緒九年十二月二十四日先謙記

仙人市先墓記

先母鮑氏生嘉慶十三年戊辰五月初一日酉時卒光緒八年壬午三月十六日辰時年七十五 誥封太夫人先兄敬吾公諱先惠縣學廩生生道光十七年丁酉十二月二十七日丑時卒咸豐七年丁巳八月二十四日酉時年二十一 馳贈通奉大夫亡弟禮吾諱先恭縣學生分省補用知府生道光二十九年己酉十一月初九日卯時卒同治十年辛未三月二十九日午時年二十三 誥授中憲大夫亡室張氏生道光二十一年辛丑十一月二十五日卯時卒同治元年壬戌十月十

二日寅時年二十二 誥封夫人周氏生道光二十三年癸卯五月二十二日亥時卒同治五年丙寅十月初七日辰時年二十四 誥封夫人弟妻張氏生道光二十八年戊申八月初七日丑時卒同治十年辛未五月二十一日卯時年二十四 誥封恭人先兄等俱葬省城東南數里所逮吾母喪歸葬東鄉五十里仙人市栗樹壠迺遷以附左敬吾公次禮吾右張夫人次周夫人次張恭人不孝爲此匪以爲壞吉也求吾心所安而已不孝早孤薄遊四方遠離吾母之日多矣同治辛未吾弟沒母始就養京師自是十二年不孝奉 命典試外



不敢輕去母側若以事它往久未歸及命食不卽時至則母顏爲之不怡近數歲兒女天喪母邑邑不樂不孝攜書就榻旁讀或講說市井可嬉笑事迺頗解慰蓋未嘗一日不如是也今母長逝矣而不孝偷息人世懼吾母九原之靈或以寂處傷懷得諸子婦環左右侍顧之而弗異生時其少愉乎不孝異日獲薄田百畝築廬墓側死則於數里內擇地葬庶幾重壤之下不遠伊邇得以魂魄相依倚此不孝之志儻亦吾母所望於不孝者與嗟夫母生不能殫心色養及沒也徒爲是不得已之思果何益哉果何益哉世之人有父母存者毋忽忘於

目前致如不孝今日抱無涯之慟也墓地別爲圖說吾  
母及兄弟輩生平事實備諸志狀不復述光緒九年十  
月二十四日不孝男先謙謹記

重脩寄園記

先謙曩在京師卽聞座主今都御史祁公述其少時侍父文端公於江陰學署得常游所謂寄園者旣奉視學江蘇之命公出示所藏寄園消夏圖則文端嘗以夏日與李申耆苗先路張石舟諸君子宴集斯園逮入參樞密迺圖而記之復自書園居時所爲詩數十篇於後其於斯園蓋惓惓也先謙於是得具知當日園中亭舍之美與景物之麗祁公曰斯園吾不詳其自始以寄園命名則始於陳侍郎希曾吾嘗稽之志乘明萬厯四十二年移建學署江陰其先邑人有季科者以江西布政

使右參政告歸養母築清機園以居越數十年季氏陵  
夷割園入署圖中荷池卽季氏雪浪湖池旁有屋數楹  
志以爲賜閒堂遺址也科所著詩文有寄寄堂橐蓋又  
嘗取寄義以名其堂陳公之名寄園殆權輿於此咸豐  
庚申署燬於賊亂定建署而園不復陳公視學之歲距  
今且七十年今江陰縣志於寄園初弗之及吾慮斯園  
之終湮也先謙旣到官暇日周覽其地則垣墉隕夷蕪  
穢盈溢一池之外悉無存者愀然傷之感祁公之言亟  
謀修復經始光緒乙酉仲冬落成於丙戌季春爲廬曰  
永慕以奉先謙父母遺像堂曰虛受爲朝夕讀書游憩

之所存雪列岫諸亭竝仍其舊增置廊榭以延攬景光  
綴以梅塢竹徑閒以菊圃菜畦奇石列秀嘉樹環植菴  
舊盈陂與水相鮮而園之勝亦略具矣余維兵興以來  
江南戶口凋殘巨室名園美舍咸委灰燼當日壯觀十  
不存一一園之廢興何足深論然余常以佳日涉覽其  
中登高邱俯清流思季氏昔日辭榮養志之高風及文  
端與賓友考道論文之雅則慨然興慕憾不獲與之共  
游處於此者豈不以其人之足爲斯地重哉人之生無  
之而非寄也故古人況之以逆旅等之於蜉蝣及觀賢  
聖之行事守泰山而持千鈞曾不以造次回易其志慮

彼豈未明達士之旨邪蓋所爭者在吾之所以自樹而於世俗之滯留於心者如寄諸天地閒而不以撓吾念則我重而萬物皆輕苟居得爲之位而傳舍視之藉虛無放曠之論以飾其全生持祿之私是爲蒙莊揚其波而王衍劉伶諸人之所以濁世而階亂以此言寄奚足重斯園而爲居游於此者儆邪後之覽者思季祁二公偶寄之跡所以常存而不敝者何在則於陳公名園之意庶有合矣旣以告祁公遂爲之記

永慕廬記

光緒八年五月先謙奉母喪自京師歸葬長沙卽所居爲永慕廬而郭侍郎嵩燾爲之銘旣除喪之明年入都補官越二月遂奉督學江蘇之命旣蒞官葺復署西偏之寄園復爲廬於園北隅奉吾父母遺像其中朝夕瞻拜以志永永無極之哀蓋天下負罪引慝之僇民未有如先謙之甚者也先謙年二十不幸先贈公卽世時兩兄先逝而先謙方爲貧諸生不克備一日罄絜之養逮其沒也葬祭之禮多闕而不舉視仲由氏之所傷幾或過之甫卒哭卽橐筆出游日營升斗以奉吾母又不

能居廬負土衰麻三載少竭誠恫以贖萬死之身而與  
吾母違離之日亦彌以多矣自季弟沒先謙以供職詞  
館迎侍吾母京師十二年中疾苦相仍殤逝相續怫鬱  
之事抵隙沓至皆先謙之不德以重貽母憂蓋求一歲  
之安善以供笑樂而卒無有也此卽文章貴仕極一時  
之寵榮然以較閭巷窮民翁媼相將扶杖攜童尙僂笑  
語者其戚愉虛實之情曾不可以並論況若先謙之瑣  
瑣無足道者邪吾母嘗語先謙汝父不及見汝成名齋  
恨入地予亦何敢奢望惟期汝視學南中行省予得就  
養官廨秩滿卽侍予而歸此願儻可償乎今先謙蒙



恩竊祿來官此邦瞻望白雲吾親安在不能不仰天搏  
膺而長慟也昔孟子稱大孝終身慕父母徵之帝舜五  
十而慕此爲父母在言也若父母旣沒觸念生慕人之  
恆情雖終身亦不足言孝如先謙之不肖少無以承親  
權及壯強之年迺益以重其感每追惟前事哀從中發  
不知涕泗之橫落也故頻年以來隨所居爲廬而名曰  
永慕者以此志稱署西偏爲前明江西布政使右參政  
季科清機園故址當隆慶時科以壯歲辭官奉母母年  
九十卒此其構園娛侍地也今雖遺蹟蕩盡流連愴歎  
猶想見白華無聲之樂而土人相傳園中舊有三到樓

者。因。諸。城。劉。文。恭。公。鑑。之。之。母。嘗。三。居。此。署。故。以。名。樓。  
至。今。稱。爲。盛。事。念。前。哲。之。嘉。遇。顧。鮮。民。之。塊。然。是。皆。先。  
謙。所。觸。事。而。增。唏。者。也。寄。園。成。旣。爲。之。記。復。特。爲。斯。廬。  
記。其。緣。起。云。

江陰學使院續刻題名記

謂。居。官。難。乎。甲。往。而。乙。來。朝。至。而。夕。遷。懷。印。挖。綬。意。氣。赫。然。紛。綸。盈。乎。天。下。謂。居。官。易。乎。則。名。於。其。職。者。十。不。一。二。數。也。今。夫。督。學。之。官。將。以。佐。聖。主。興。行。教。化。董。正。學。術。顧。終。歲。不。得。與。士。子。講。論。劇。切。神。疲。於。馳。驅。而。精。敝。於。考。校。於。是。求。所。以。自。盡。者。惟。在。士。子。應。試。之。文。幸。而。去。取。無。大。差。失。翕。翕。然。羣。奉。爲。能。否。則。瞢。然。不。辨。黑。白。傾。倒。錯。繆。使。人。懷。才。無。以。自。見。而。文。固。不。能。自。鳴。其。不。平。非。如。有。司。折。獄。失。中。曲。直。昭。於。比。戶。而。利。害。切。於。民。生。也。苟。非。其。人。滅。裂。無。恥。之。甚。者。則。相。與。忍。而。伺。

之三年受代斯已耳是故居此官之爲難與易其間幾於不可辨丹徒李學士承霖語余先達有言爲學政者聰明彊力不見有餘昏昏昧昧不形不足彼意有所激而云爾夫誠思盡心以求稱朝廷設官本意雖極天下之才未有不飲然自見爲不足者而何有餘之可言哉江蘇自前明萬曆四十二年移學使院江陰官此而題名者爲碑凡四粵寇陷江陰署燬碑存亂定建署逾二十年而題名之缺今且七十年人咸謂余此故事亦榮名也盍爲之續俾後有考余謂苟以官爲榮人之具而不思所以實其名則其榮也祇足以爲辱耳聊以補

故事之闕斯可矣。遂記之。明江蘇巡撫毛一鷺嘗助魏奄逮周忠介順昌者。其爲督學時。實始爲茲署。題名記邦人士請毀之余。以爲此非王振功德碑比也。存其名。足以示戒。止弗毀。此又視其人畢生之賢否。以爲榮辱而不專係乎督學者。並書以自儆。且告後之人。光緒十四年秋八月記。

南菁沙田記

南菁沙田者松江川沙廳竟東海中橫沙也道光間始見可萬畊厥土斥鹵草蘆生之可伐爲薪漁於海者公焉而內貲廳之官吏所謂草息者也同治中徵息入江蘇布政使庫歲八百千光緒七年江南大吏有清丈新漲沙灘招佃報買之奏於是候選道姚君文枬清河道費君學會等仞佃橫沙四萬餘畊賈銀至萬二千歲徵息至二千千眾競於利爭訟積年姚君費君願入公爲書院膏火費余又償它姓佃賈銀六千兩有奇沙遂爲書院有最灘以蘆草泥計者共五萬畊蓋已視昔加贏

此南菁書院有沙地之始草蘆得鹹潮益茂故高阜轉  
稀擇地闢之可得二萬畝薪樵無損而菽麥加豐以屬  
姚君等董其事經始光緒丁亥畝四之一隄防溝洫聿  
有成績餘次弟盡墾之此沙地有田之始今歲入告部  
議升科嗣是沙田爲書院恆產利賴及久遠矣記曰天  
不愛道地不愛寶造物之資於人者日取焉而不窮在  
善理之而已吳地襟帶江海彌望衍沃得漲沙則土人  
擁圩而耕久之戶口滋多小爲鄉聚大則都邑今靖江  
崇明是矣茲沙也闢可以事諸浮食無產業民苟主之  
者盡招徠區畫之方絕龍斷苛擾之弊數十百年後宜

或有建官分治事而其地直吳淞口外百里所爲海上  
天然屏蔽異日築城郭設汛防言形勢者將有取焉又  
不獨書院區區之利也已沙無名名以南菁自余始光  
緒十四年夏六月記



懷翼草廬記

李君幼梅旣葬其母徐太夫人於長沙河西都緋珠塘  
卽墓所爲廬名之曰懷翼而告子曰人莫不愛其子然  
吾獨以爲天下之愛子者莫吾母若也自吾居母喪爲  
此廬日讀禮其中冀與吾母相密邇今服除矣然過茲  
以往吾心不能一日去斯廬也廬前有亭後有堂有簃  
有齋有園吾顏亭曰依依堂曰白雲簃曰寄夢齋曰五  
思園曰鞠非故繁爲之文也吾入茲廬而不啻吾母常  
目在焉則是吾母雖亡如不亡也將以章母之德而寄  
吾之懷於無窮子盍爲我記之予維古人之善懷其親

者莫如小宛之詩其首章曰明發不寐有懷二人其四章則曰我日斯邁而月斯征其卒章則曰戰戰兢兢如臨深淵如履薄冰君子劬學敬身非直爲己已也以爲求無忝於其親者惟在是也思親之成我如其艱則我俛焉孳孳以仰慰吾親於九原者不敢不至此所以爲善言懷也君之始生卽育於太夫人顧復恩勤逾於己出自君讀書成立掇科名任監司奉太夫人教彌謹太夫人亦不以君貴故少有假借逮其沒而君擗踊哀思歷久而不忘固君天性純篤亦愈以見太夫人之賢斯懷翼所由名也魯語曰鳥翼毳卵翼之爲言成也詩

曰。詒厥孫謀。以燕翼子。言能遺善謀。以安成其子孫也。人與物之翼。其理雖異。而非甚異也。惟賢者能爲後嗣謀。安成之善道。則其所以翼不與物同。如太夫人之於君。仁不奪於其私。而義不虧於其愛用。能成就令器。以榦國而棟家。其爲翼孰大。於是宜君懷之永而不能已於文也。君與予爲張氏友壻。又以氣誼許與。過從逾密。得聞太夫人懿行爲詳。而予自遭母憂以來。悲慟纏綿。視君尤有不能自釋者。援琴而鼓歌。則相與沾襟矣。惟舉古人之善懷其親者。交勉焉可也。

捐建福尹二公祠記

福尹二公死事狀具詳王按察所爲碑斯祠之建距死  
事時四十有三年矣先是大吏爲福公請於 朝得建  
祠會城東而尹公祀典闕如於是湘陰李君幼梅謂宜  
立祠墓所並祀二公旁埒弁兵以永馨香之報羣議旣  
洽鳩貲庀材時歷四旬事用大集以屬先謙爲之記夫  
事有氣決於一時而惠流於千載者二公之於吾楚是  
已粵寇之來犯也剽悍甚二公所將陝兵遠道飢疲勢  
不足遏方張之燄苟其臨事稍有顧慮一潰而走則長  
沙必不守而二公乃能激厲士卒爭先捍敵殺傷相當

雖至力竭不支卒皆駢首效命義不返顧彼其心知有君國而已而會城資其數時捍禦之力急修守備終以保全無事生聚至今者誰之賜與宜吾楚人彌久而不忘也古有生蹈義烈沒爲明神威靈赫然使人奔走崇敬而勿替者蜀漢壽亭侯吳秣陵尉其稱著矣若保衛地方以死勤事如向忠武張忠愍之於吳劉忠壯之於秦隴天子爲之崇飾廟貌春秋享祭其勛勞章顯故食報特隆至於所係至鉅而所處至隱如二公死難事若不亟爲表章更歷數十百年莫能詳其顛委卽有騷人墨客往來蔓草拱木閒不過等諸國殤之歌戰場

之。弔。其。何。以。伸。九。幽。之。毅。魄。而。繫。不。死。之。人。心。此。李。君。建。祠。之。議。爲。不。可。少。也。捐。貲。若。干。弗。勞。而。給。則。吾。鄉。懷。忠。慕。義。之。風。有。足。多。者。李。君。名。輔。燿。按。察。使。銜。浙。江。候。補。道。董。修。者。撫。標。參。將。同。邑。劉。君。高。照。也。

水月禪林記

水月禪林者不詳其建造之始湘陰李文恭公昔處幽  
仄茲焉授徒旣貴矣而微時誦讀攻苦之地不能忘也  
迨歸自江南結宇東城密邇斯寺崇構爰基淨域來屬  
儻所謂情照旣動而因果隨之者與公自未爲諸生時  
名山館曰芋香嘗以鐫之印章後遂爲居宅之額聞諸  
長老言公洪音偉幹識者許爲非常人吾意在禪林時  
亦或嘗有高僧往來相贈答如唐世鄴侯遇明瓚故事  
因爲山館之名以寄意邪惜乎年世已邈無能述其軼  
事者也公嘗有禪林夜坐詩清曠閒適爲人傳誦今存

集中昔唐王播段文昌貧困寺居爲僧所侮有詩題寺  
木蘭曾口異地同符貴顯後流爲嘉話王定保孫光憲  
猶紀述之公少厲固窮之節未有失色墜言貽人口實  
已非王段輩所敢望及居峻秩勛業爛然其遺集亦流  
行宇宙斯寺又爲李氏永業香火之供與世澤俱長區  
區題寺韻事又不足言矣公孫幼梅觀察瞻顧祇林眷  
懷先蹟思託於文字俾無泯沒觀察才望隆懿足以繩  
其祖武匪直善述之美而已余故樂爲之記



慕萊堂記

大戴記言老萊子之行見美於孔子史公高其人與老子同傳劉向迺以爲仙迹其著書垂教守眞全生可謂有道者也而後世豔稱獨舉高士傳著斑衣娛母事豈不以道敝俗媮至行難能而可貴其逾老彌篤者尤爲世推重與孟子言五十而慕惟見大舜一人吾意老萊子庶幾近之而孟子無述將飛遜之士名隱而事不章與夫大舜帝王之孝非後世臣庶所敢仰望若老萊之爲人人能之而終身企及者卒鮮願世亦未有誠慕父母而不慕老萊者也江西臨江府城北有老萊亭相傳

爲其故里李君藝淵權守是邦以親老不得迎侍顏慕  
萊於其堂高士傳稱老萊耕蒙山之陽楚王至門迎之  
遂去至江南而止臨江遺跡宜可信夫以老萊之性行  
動人感興曠世一旦親至其居俛仰循陔馨膳之所必  
有流連慨歎油然而契合於天懷者況於身羈簪紱不得  
遂板輿之榮養者乎宜吾藝淵慕之尤切也藝淵權守  
之次年以憂歸里不及聞父母遺言用爲至慟又十年  
與余相遇長沙屬補爲之記夫老萊惟棄卿相之貴傲  
然長往以自屏於葭牆蒿室之中故養生送死如彼其  
無憾也余竊祿朝班奉親京邸屬有事東陵而吾母

卒邁危疾相見不能一語可慟與藝淵同逮奉使吳中  
爲永慕廬署側以摠余哀較藝淵爲堂時情況又弗如  
遠甚其在詩曰鮮民之生不如死之久矣慕古人乎慕  
吾親乎吾與藝淵亦惟虛寄之語言文字而何有萬一  
之補也嗚呼光緒二十一年歲次乙未仲夏月

珠暉塔記

靈塔經始蕭元爲盛隋安舍利遂徧諸州迨像法陵夷而形家言起詫茲實相有同卓筆可以裨助文事贊發科名空色之理自如仁智之見各異豈非道無定體與世推移者與珠暉塔者今安徽巡撫衡州王爵棠中丞所建湘水過郡城而北耒水入焉水經注云西北至臨承縣而右注爲耒口者也兩岸山巒宛延無聳特之觀郡人觀流泉而相陰陽咸謂承耒匯湘之所得塔爲宜諮於中丞捐奉獨任爰擇拜亭山之陽奠庠累崇閎魄厯稔落成於光緒丁酉費金六萬有奇高十丈五尺層

構既章嘉名用顯郡北里所承湘來同前明有塔建自  
曾文恪公健此雙流題曰來雁中丞名業絜燉文恪斯  
塔巍然東西並峙郡人喜樂奔走來登覩形勝之畢赴  
卜人文之效靈歎想嘉績不遺鄉邦卓立一軀永昭萬  
禩可謂崇福自邇樹因無窮者矣塔址故陳產陳宗器  
謀諸其族感斯義舉咸樂捐舍度地班材積勤終事程  
觀察穌祥之力爲多捐貲任歲時埽灑修葺者周吉云  
朱宗勝庚子夏六月記

楓山致懋饗堂記

巍然起於泰和之西北者曰玉華山楓山其南支也名不見於志乘自蕭蒲邨孝廉敷政以葬其尊人楷堂觀察迺特顯於世云山之爲境重嶺疊阜環複如城東對青原紫瑤諸峯目窮百里蒼蔚無際天馬山近在其南草樹當風狀若振鬣而嘶楓山中峯曰大瑞觀察瑩域在焉近人紀勝續爲八景其一曰大瑞晴嵐者也山形如獅右有丘如巨魚其側清泉涌溢下爲深溪流溉百畝又有一溪交匯縈紆映帶左右行十餘里以達於贛江瑩域之旁平原廣袤百丈而巖中爲饗堂蒲邨奉觀

察及配石夫人木主祀焉取禮記祭義語名堂曰致慤  
後爲別墅建書塾俾子弟族姓習業其中山故多文石  
大木之饒截柏立柱致砥爲階堂宇靚深觀飾瓌璋室  
戶四達極眺原野邇綠遠碧不可殫形邑西佳勝於是  
爲最觀察以副貢入貲得官未行而卒年甫五十如驂  
騶之將騁於塗奄忽滅沒蒲邨烝烝之恩彌久弗衰欲  
以志哀慕而妥先靈斯堂所由建也蕭氏世爲泰和右  
族通志稱南唐國子祭酒瓚明國子學錄執平涼訓導  
岐並以孝行爲世推頌蒲邨天性純竺殆欲趾美前哲  
家雄於財而多心計自得此山益墾荒鉏蕝購致佳果

茂樹尤廣種桐茶收十年之利於以安田宅長孫子而  
徼先人之福於無窮亦與古昔勤種植盡地力者意有  
合焉凡此皆其可述者也余故樂爲之記光緒二十九  
癸卯歲夏六月



定香亭圖記

代

浙江學使署西偏有園數畝舊引水爲池而亭其中嘉慶二年阮文達公始更新之環亭種荷取放翁詩意名亭曰定香而刻記再到亭之碑陰當乾嘉之際海寓清晏民物殷富四方鴻生鉅儒咸沐休明之澤接踵輩興而文達於時祓濯羣才振發風雅因得以其餘暇投壺賦詩登眺爲樂極一時之盛粵寇煽東南杭州淪陷者再聲明文物之區夷爲犬羊窟宅斯園亦蕪沒於荒榛斷梗之中今距賊平廿年矣回憶寇盜猖熾時烽火四徹鼙鼓殷天雖以草木禽魚之無知舉不得遂其生息

翔泳之性大亂既定宇內得少蘇息而斯園之勝亦漸復舊觀人事之反覆境地之遷改蓋亦文達當日所不及料者昔周人思召伯不忍伐所舍之棠以睹其物則懷其澤也浙人之愛敬文達不後於召伯雖一亭之微猶相與慨慕弗置若惟恐其廢而不修然則物之成敗靡常其卒能持久而不敝者豈非以其人歟余以乙酉夏至浙喜斯園閒曠稍加葺治叢薺就剌佳幹畢露暇日登樓以望遙見湖上諸山蒼翠萬狀若爭爲斯園效勝退而憩於亭芰茹盈陂丹縹間發激懷獨清眾芳不歇徘徊而樂之感盛衰之無端想昔賢之遺風因屬錢

唐戴君某爲圖刻諸石貽來者觀焉余覽文達所記署  
內有老桂十株又補種梅桂桃柳若干今園中之木都  
非曩時所有其燬於寇與戕於人皆不可知則以歎材  
之在天地間成之至艱而毀之易盡要在培養愛護之  
而已當無事不亟爲之所不幸有變其何以備之哉噫  
若文達之於浙人庶乎其知此意者矣再到亭者安溪  
李文貞公之孫穆亭先生暨其子郁齋先生再世督浙  
學郁齋母夫人作亭紀實亦邦人所歎異云某年月日  
某記